

1 Pedro

¹ Høøch xøhajp Pedro. Jesucristøch xquiuguexyhajp. Mijts hädaa nocy nyajnäjaayøøby pønjataiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduhñ xiøhatiän Ponto, møød jim Galacia, møød jim Capadocia, møød jim Asia, møød jim Bitinia.

² Jequiän mijtsä Diosteedy xwyiimbiiyy. Tøø Dios hänajty ñajuø'øy coo mijtsä miädia'agy hänajty mmäbøgaanä. Ja'a yhEspírituhaamä Dios hajxy tøø xyaghodiägø'øy, weenä mädia'agy hajxy jaduhñ mmäbøgät ja'a Jesucristocøxpä. Jaaya'ay hajxy tøø xyajnhwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy mõj may.

³ Tsøgä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønähajtäm. Hojiootä Dios jiaanç tehñ miøød ja'a højtscøxphajtäm, paady hajxy homiänaajä xyagjugyhadäänäm neby je'e jiugyhatiän. Coø Dios ja'a Jesucristo yagjuypiøjtägajch coo hänajty tøø yho'ogy, jaduhñä tøyhajt hajxy nmøødhajtäm coø Dios hajxy jaduhñ xjiaanç yagjugyhadäänäm homiänaajä

⁴ jim tsajpootyp. Jimä hoyhajtä weenhajt hajxy mõj may xmio'owäänäm, neby jaduhñ jecy miänaañän cooc hajxy hänajty xmio'owäänäm. Tijaty hajxy yaa nyagjugyhajtäm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyijatiä Dios

hajxy jim xmio'owáanäm tsajpootyp, cab jaduñ mänaa quiøxa'añ, cab jaduñ mänaa mia'ada'añ, cab jaduñ mänaa quiuhdägoyya'añ. Homiänaajä yajxon yhida'añ.

⁵ Coö mijtsä Dios miädia'agy jaduñ mmäbøjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduñ mänaa mguhdägoyya'añ. Coö ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim xyajnöcxáanäm tsajpootyp Dioswiinduum. Jimä Dios hajxy homiänaajä xyagjugyhadáanäm neby je'e jiugyhatiän.

⁶ Paady mijts jootcuje mhity, hoy hajxy jäda'ahaty madiu'u mja tsaächpøcy. Pero cab hajxy jeicy mdsaaächpøga'añ.

⁷ Høxtahmädsä oro, jøønaamä jäya'ayä oro hajxy yhijmach pø hoyhoro jaduñ. Jaanä jaduñ mijtsä Dios xyhijxmajtspä pø hamuumdu'jootä miädia'agy hajxy mmäbøjcä, hoy hajxy mja jaanč tehñ chaaächpøcy. Jaanč tehñ choobaatp jaduñ coö hajxy jaduñ mmäbøgät tehñgajnä. Cabä oro jaduñ jiaty tsoobaady neby jaduñ choobaadiän nej mijts homiänaajä mmäbøquiän. Hix, tsipcøxpä oro jaduñ quiuhdägoyya'añ. Y coö Jesucristo yaa quiädaactägatsa'añ, mänit mijts xquiumaya'añ je'eguiøxpä coö hajxy hänajty tøø mmäbøcy, hoy hajxy hänajty tøø mja jaanč tehñ chaaächpøcy.

⁸⁻⁹ Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduñ, y mmäbøjcäbä miädia'agy hajxy jaduñ. Hoy hajxy tøø mga'a jagä hixy, coö hajxy jaduñ mmäbøcy, paady hajxy jaduñ tøø xyajnähwa'ačh. Coö hajxy

jaduhñ tøø xyajñähwa'ačh, paady hajxy jaduhñ mjaanč tehñ xioonða'agy nägø'ø nädecypiä.

10 Ja'a jäya'ayä Diosmädia'agy hajxy jecy yajwá'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agóøjät hawa'adstuum. Cab hajxy hänajty ñajuø'øy neby hajxy jaduhñ jim piäda'agóøjät. Pero ñägapx hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojioot miøødä.

11 Yajtøøby hajxy hänajty pøn mijts hänajty min xpiäda'aga'añ hawa'adstuum. Jaduhñ hajxy hänajty yajtøøbä mänaa hänajty myina'añ. Ja'a Dios jaduhñ hawaanä ja'a yhEspirituhaam cooc tu'jäya'ay hänajty yaa min chaachpøga'añ. Y cooc hänajty tøø yho'nä, mänítäc hänajty jiuypijøjtägatsa'añ. Mänítäc hänajty jim ñøcxtägatsa'añ tsajpootyp maa Dioswiinduumän. Pero ja'a jecyjäya'ayhajxy, cab hajxy hänajty jaduhñ ñajuø'øy pønä Dios hänajty tøø ñänømy ja'a yhEspirituhaam. Nä'ä cujahy hajxy jaduhñ nebiaty hajxy jaduhñ ñajtsapxøøyyä.

12 Mänit hajxy jecy yhawáanäxä coogä Dios jaaya'ay hänajty quia'a tsoj quexa'añ, ja'a mijts hänajty xpiäda'agaambä hawa'adstuum. Cujéquiägä Dios hänajty quixa'añ. Hoorä, tøø quiejxnä. Jaduhñ tøø yajtøjijajnä coo ja'a yajñähwaatspä tøø quiejxnä. Y tøø mijts jaduhñ mjaanč mädoyhaty coo ja'a yajñähwaatspä yaa tøø yhoy. Ja'a Jesucristøch jaduhñ nnänøømby coo hajxy hoy xñähho'túutam. Y jaaya'ay mijts xyajmädoyhájtäbä, ja'a Dios ja'a yhEspirituhaam hajxy jaduhñ ñajtsapxøøyyä

nebiatiä Diosmädia'agy hajxy yajwá'xät. Tsajpootypä Dios ja'a yhEspíritu yajtsohndaacy coo jaduñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduñ jim hijpä tsajpootypä, jiaančh tehñ yagjuøby hajxy jaduñ coo Dios ja'a yHuung jaduñ yaa quiejxy hädaa yaabä naaxwiin, coo højts hoy xñähho'túutäm.

13 Y coo Jesucristo jaduñ yaa jadähooc quiädaactägatsa'añ, mänit hajxy jaduñ jim xyajnøcxáañäm tsajpootyp maa Dioswiinduumän, pønjatiä Diosmädia'agy hänajty tøø miäbøcy. Mänitä hoyhajtä weenhajtä hajxy jim ca'xy xmio'owáañäm. Coo Dios jaduñ tøø miäna'añ coogä yHuung yaa quiädaactägatsa'añ, jaduñä tøyhajt hajxy nmøødhájtäm coo jaduñ tiøjiada'añ. Tsøcxä njoot hajxy pädáacäm maa hoyhajtän, maa weenhajtän, mädyii Dios hajxy hänajty xmio'owáañäm. Tsøcxä hajxy hoy wädíjtäm. Tsøc hajxy jahmiejtstáacäm coo Jesucristo yaa quiädaactägatsa'añ.

14 Coo Dios hajxy xyhuunghájtäm, paadiä miädia'agy hajxy tsøc mäbøjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoyhatyñä.

15 Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødá. Jaaya'ay hajxy jaduñ xyajnähdíjjäm coo hajxy xquiu'ughadáañäm. Paadiä hojioot hajxy tsøc yaghíjtäm nebiä Dios hojioot miøødän.

16 Jaduhn jim myiñ cujaay maa Diosmädia'aguiän: “Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahijx padúunäc”, nømä Dios jecy miänaañ.

17 Ja'a Dios hajxy nwiingudsähgøøyyäm. NDeedyhajtäm hajxy jaduhn. Paady hajxy hoy tsøc jäya'ayhajtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduhn coo Dios hajxy xyajcumädowáanäm nebiaty hajxy hänajty yaa haxøøg tøø njatcøøyyäm hädaa yaabä naaxwiin, hoy hajxy hänajty näje'e tøø nja mäyøødsánáayyäm.

18-19 Ja'a nhaphajtäm ja'a ndeedyhajtämhajxy ja'a jegyhajtypä, coo yhamdsoo cuhdujt hajxy hijty hoy quiudiuñ, jadúhnäc tyijy hajxy ñähwa'adsa'añ. Y jaduhn mijts tøø mbahabøjpä. Pero cab jaduhmbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädáacäm hawa'adstuum. Ni tii hajxy jaduhn xquia'a pädáacäm hawa'adstuum, ni xädø'øñ. Hix, paquiä xädø'øñ quiøxy. Jagooyä Jesucristo hajxy xpiädáacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädáacäm hawa'adstuum. Coo Jesucristo ja'a poj ja'a cädieey häxøpy miøødhaty, cab hajxy häxøpy tøø xpiädáacäm hawa'adstuum.

20 Jéquiänä Dios ja'a yHuung jaduhn yajnähdiijy cooc hänajty yaa quixa'añ hädaa yaabä naaxwiin, cáhnäc hädaa naaxwiimbä hänajty yhawijy tiøø'xta'agy. Pero cabä Dios ja'a yHuung choj quejxy. Cujecy jaduhn quiejxy mänaabä

højts hänäjty yaa njugyhájtämbä. Højts hoy xñähho'túutäm.

21 Coo Jesucristo hänäjty tøø yho'ogy, mänitä Dios yagjujypiøjtägajch. Mänit jim jadähooc yajnøcxy maa wyiinduumän. Jim jäda'ahaty wyiingudsähgø'øyii. Y coo Dios ja'a yHuung jaduñ yagjujypiøjtägajch, paadiä miädia'agy hajxy tsøc mábøjcäm coog hajxy xyagjugyhadáañämbä homiänaajä neby je'e jiugyhatiän.

22 Tøyyä Dios miädia'agy. Y coo mijtsä miädia'agy hoy mgudiuunä, paadiä mjootä mjuøhñdyhajxy nähwa'ads yhity. Naxy hajxy jaduñ mdehm ñichoc mdehm ñimiee'xøøjät hamuumdu'joot. Jaduñ hajxy mnijiäwø'øwøøjät nebiä tu'que'expän nebiä tu'mägu'ugpän.

23 Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjugyhadáañäm neby je'e jiugyhatiän. Jaduñä hojiootä howyiinmahñdy hajxy xmiøoyyäm hawiinjemy, je'eguiøxpä coo miädia'agy hajxy nmábøjcäm. Cabä miädia'agy mänaa quiuhdägoyya'añ. Jaaya'ay hajxy jaduñ xyagjugyhadáañäm homiänaajä neby je'e jiugyhatiän, ca'a piønä hädaa yaabä naaxwiimbä, ni ja'a ndajháltäm ni ja'a ndeedyháltäm. Haa ja'a hädaa yaabä naaxwiimbä jugyhajtä, tsipcøxp jaduñ quiøxa'añ.

24 Jaduñ jim myiñ cujaay maa Diosmädia'aguiän:

Høxtahmdsä pøjy, hoy jaduñ jia yajxonä, tsipcøxp je'e ñäl'ägä tø'øch.

Jaduhñ mäwiin højtshájtäm, hoy hajxy mõj jaančh
nja niijiäwøøyyäm, tsipcøxp hajxy nnä'ägä
ho'og nnä'ägä tägoyyáañäm.

25 Pero ja'a Diosmädia'agy, cab jaduhñ mänaa
quiøxy tiägoy.

Ja'a Diosmädia'agy jaduhñ mänaamb coogä Jesu-
cristo hajxy hoy xñähho'túutäm. Tøø mijtsä jäya'ay
jaduhñ xyajmädoxyhaty, ja'a Diosmädia'agy hajxy
jegy yajwá'xäbä.

2

1 Coö Dios hajxy homiänaajä xyagjugyhadáañäm
neby je'e jjugyhatiän, jaduhñä hojiootä howyiin-
mahñdy hajxy tøø xmióoyyäm hawiinjemy. Paadiä
haxøøgjootä haxøøgwiinmahñdy hajxy tsøc najt-
shixøøyyäm cøxiä. Cab hajxy mnä'ägä høhñdá'agät
ni weeñtiä. Hamuumdu'joot hajxy jaduhñ tøy
mjaančh hojiäya'ayhádät. Jii jäya'ayhajxy näje'e,
cabä Diosmädia'agy hajxy hoy quiudiuñ, hoy
hajxy jia nidijyii nebiä hojiäya'ayän. Ca'a ha-
jxy jaduhñ mbahixy. Ca'a hajxy pøñ cøxiä wi-
inä myajcuxøøghadø'øy. Cab hajxy mniñähøøñ
mniñähøjøøjät.

2-3 Tøyhajt jaduhñ coö Jesucristo mayhajt mõj
may tøø tiuñ maa mijtsøxpän. Mnajuøøby
hajxy jaduhñ, túhmäts. Hahixøøbyxiä jaduhñ
coö miädia'agy hajxy tehñgajnä mbanócxät.
Høxtahmñdsä maaxhuunghajxy, coö hajxy hñajty
chi'idsa'añ, mänitä tsi'tsc hajxy ñäjø'øy. Jaduhñ
mäwiin mijtspä, mba'yá'axäp ja'a Dios hajxy
coö quiapxiä miädia'agy hajxy ween tehñgajnä
xjiaac yaghabøcy. Jaduhñ hajxy ca'xy pedyii

hoy myajtúnät. Y cab hajxy jaduhñ mänaa mdu'udägóyyät.

⁴ Tehngajnä Jesucristo wyiinmahñdy hajxy jaac tehñ piahixä jaac tehñ piaduunä. Ja'a Dios jaduhñ jecy wiinmaayy coo hõjts hñajty jaduhñ xyhuunghadaänäm ja'a Jesucristocøxpä. Ja'a Jesucristo, ja'a Dios yHuung je'e, paadiä cuhdajt jaduhñ miøødä coo hajxy nwiingudsähgøøyyämät. Pero cabä jäya'ayä Jesucristo hajxy näje'e jiøjpøgø'øy. Cab hajxy wyiingudsähgø'øy. Xiøøghajpy hajxy jaduhñ.

⁵⁻⁶ Jaduhñ jim myiimbä cujaay maa Diosmädia'aguiän:

Jim maa cajpt jaduhñ xiøhatiän Siön, jimhøchä ndsajtc tu'ug ngojy.

Tú'ughøchä tsaa nwiimbiyy coo jim piäda'agøøjät maa tøjteecän.

Jaanç tehñ tiuunḡpaatp yø'ø tsaa jaduhñ.

Ja'a Dios ja'a Jesucristo jaduhñ yajmäbaat nebiä tsaa ja'a jaanç tehñ tiuunḡpaatpän, coo jaduhñ yaa quiejxy hädaa yaabä naaxwiin, coo hajxy hoy xyajñähwáatsäm. Jaduhñä Dios miänáangumbä cooc tsipcøxp yajtøjiada'añ coo hajxy jim yajnøcxa'añii tsajpootyp maa Dioswiinduumän, pønjaty jaduhñ mäbøjp coo Jesucristo hajxy xyajñähwáatsäm, ca'a wyiinghänä'cä. Coo

Jesucristo hajxy tøø xjiaanç yajnähwáatsäm, jaduhñä Dios hajxy tøø xyajñähdíjäm coo Jesucristo hajxy nmøødhíjtämät tu'ugmädia'agy. Tehngajnä Diosmädia'agy hajxy tsøc hoy jaac tehñ quiudiúunäm. Tsøgä Dios hajxy hoy jaac tehñ wyiingudsähgøøyyäm. Jaduhñä Dios hajxy xquiumáayyämät.

⁷ Coo mijts jaduñ mmäbøcy coo Jesucristo hajxy hoy xyajnáhwáatsäm, paadiä Jesucristo hajxy mdsocy, paady hajxy mwiingudsähgø'øy. Hoorä, jaduñ jim myíingumbä cujaay maa Diosmädia'aguiän:

Jii tsaä tu'ug, cabä tøjmuu'tspädøjc-hajxy hijty hoy yhixy;

cab hajxy hijty yajtuna'añ.

Pero ja'a cudøjc, yajxón yø'ø tsaä yhixy, paady jim yajpadaacä maa tøjteecän.

⁸ Jaduñ wiingtuum myíingumbä:

Jii tsaä tu'ug, coo pøn quiuhnepy, cädaab hajxy jaduñ.

Ja'a Jesucristo jaduñ yajmäbaatä neby yø'ø tsaajän.

⁹ Højtsä Dios tøø xyajnáhdíjjäm coo miädia'agy hajxy nmäbøjcämät, coo hajxy xquiu'ughájtämät. Xyhuunghájtäm hajxy jaduñ coo hajxy ween hoy njäya'ayhájtämät neby je'e hoy jiäya'ayhatiän. Tøø cuhdujt hajxy xmióoyyäm coo hajxy nDeedyhájtämät nebiä Jesucristo ja'a Dios Tieedyhatiän. Tøø Dios hajxy xyajpädsøømäm haxøøgtuum. Hodium hajxy hoy xpiädaactägájtsäm. Jaduñä miädia'agy hajxy nyajwá'xämät coo møjmayhajt tøø tiuñ maa højtscøxphájtäm.

¹⁰ Coo mijts hijty mga'a mäbøcy, paadiä Dios hajxy hijty xquia'a cu'ughaty. Cabä Dios hajxy hijty xñäxuuch. Pero coo hajxy jaduñ mmäbøjnä, paadiä Dios hajxy jaduñ xñäxuu'tsnä. Paady hajxy xquiu'ughajnä.

11 Mägu'ughajpädøjc, hoy hajxy yaa nja hítäm hädaa yaabä naaxwiin, cabä njoot hajxy yaa tøø nbädáacäm maa hädaa yaabä naaxwiimbän. Jimä njoot hajxy tøø nbädáacäm maa Dioswiindumän. Tsøcxä haxøøgwiiinmahñdy hajxy høxhíxäm, jaduhñä Dios miädia'agy hajxy hoy ngudiúunämät.

12 Hoy hajxy mja hity maa jäya'ayä Diosmädia'agy hajxy quia'a mabøquiän, hoy hajxy mwädítät. Hoy hajxy jaduhñ mjäya'ayhadät, hoyyä jäya'ay hajxy cu xjia nähøønø'øw. Coø Dios yaa quiädá'agät tøyhajtyajyejpä, mänit mijtsä jäya'ay hänajty xyhixa'añ coø mijtsä Dios miädia'agy hänajty hoy tøø mjaanç cudiuunä, ja'a Diosmädia'agy hajxy hänajty tøø quia'a mabøquiäbä. Mänitä Dios hajxy wyiingudsähgø'øwa'añ.

13 Mwiingudsähgøøyyäbä tuungmøødpä miädia'agy hajxy. Cabä pøn jaduhñ waamb xñänømät. Hix, mbanøcxypä Diosmädia'agy hajxy jaduhñ. Y coø ja'a tuungmøødpä miädia'agy hajxy mga'a wiingudsähgøøyyät, mäna'anaambä jäya'ayhajxy jaduhñ coogä mädia'agy quia'a hoyyä, ja'a mijts jaduhñ mbanøcxypä. Mwiingudsähgøøyyäbä gobiernä miädia'agy hajxypä. Jaaya'ay møjtuung jaduhñ nä'ägä møød.

14 Mwiingudsähgøøyyäbä gobiernä mioonsä miädia'agy hajxypä, ja'a hajxy jaduhñ møjtuungmøødpä. Pønjaty jaduhñ cädiehby, je'e hajxy jaduhñ yajcumädooby. Pønjaty hoy jäya'ayhajp, je'e hajxy jaduhñ quiumaaby.

15 Jaduhñä Dios chocy coø hajxy hoy

mjäya'ayhádät. Jii jäya'ayhajxy näje'e, cabä Diosmädia'agy hajxy ñä'ägädä wiinjuø'øwa'añ. Jaanč tehñ quiuhxex hajxy jaduhñ. Hoy hajxy jaduhñ quia'a jagä wiinjuø'øwa'añ, nøm hajxy wyi'i miäna'añ cooc tyijy ja'a Diosmädia'agy quia'a hoyyá. Hoorä, coo mijts tøyhajt mhojiäya'ayhádät, caj mijtsä jäya'ay hoy xñähøønó'øwät, ja'a Diosmädia'agy hajxy ca'a wiinjuø'øwaambä.

16 Näje'ejä jäya'ayhajxy miäna'añ cooc tyijy cuhdujt hajxy miøødä coo hajxy hoñejpiä jiatcø'øwät, je'eguiøxpä coogä Jesucristo hajxy tøø yajnähwa'ačhii. Pero cab jaduhñ tiøyyä. Cab jaduhñ yhooyä coo hoñejpiä njatcøøyyämät. Pero tsögä Dios miädia'agy hajxy cudiüunäm nebiaty hajxy xyhanéhñäm.

17 Mwiingudsähgø'øwäbä jäya'ay hajxy nägøxiä. Mnichoc mnimiee'xøøjäp hajxy pønjatia Diosmädia'agy mäbøjp. Mwiingudsähgø'øwäbä Dios hajxy, jaduhñä gobiernä hajxy mwiingudsähgøøbiät.

18 Mijtshajxy moonsähajpä, mmäbøjcäbä mwiindsønä miädia'agy hajxy. Mwiingudsähgø'øwäp hajxy jaduhñ, hoy hñajty yhojiäya'ayä quia'a hojiäya'ayä.

19 Coo mwiindsøn hajxy xchaačhtiünät nä'ä nägoobä, hoy hajxy hñajty tøø mga'a jagä cädieey, mmee'xtügäp hajxy jaduhñ. Mnajuøøby hajxy jaduhñ coo Dios hajxy jaduhñ xquiumáyät.

20 Pero pø tøø hajxy hñajty mjaanč cädieey, hahixøøby jaduhñ coo hajxy mgumädówät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pø cab hajxy hñajty tøø

mgädieey, coo mwiindsón hajxy nä'a nägoobä xya-jcumädówät, y coo jaduñ mmee'xtúgät, mänitä Dios hajxy jaduñ xquiumáyät.

21 Jaduñä Dios hajxy tøø xyajnähdíjjäm coo häna'c hajxy nä'a nägoobä xchaächtüünämät nebiä Jesucristo chaačhtüünän. Hix, højts jaaya'ay xñähho'túutäm. Y miee'xtujc jaduñ. Jaduñä Dios chocy coo Jesucristo hajxy nbahíxämät neby je'e miee'xtujquiän.

22 Cabä Jesucristo mänaa ñä'ägä cädieey. Ni mänaa quia'a hōhnda'agy.

23 Coo haxøøg jia nämaayyä, cab haxøøg yhad-soodägajch. Coo chaačhtüünä, cab jaduñ waamb miänaañ coo hänajty yaghawiimbijtagatsa'añ. Ja'a Dios quiø'øjooty je'e ñibiädaacä. Hix, ñajuøøbiä Jesucristo hänajty jaduñ coo jäya'ayhajxy hänajty nägøxiä yajtøyhajtyega'añii ja'a Diósäm. Jaduñä Dios hajxy xyhíxäm neby hajxy njäya'ayhajtäm.

24 Coo Jesucristo hajxy hoy xñähho'túutäm cruzcøxp, jaduñä nbojpä ngädieey hajxy xyajnähwáatsäm. Tsøcxä ja'a haxøøgwiiinmahñdy hajxy najtshixøøyyäm. Tsøc hajxy jahmiejtstáacäm coo Jesucristo hajxy nmøødhíjtäm tu'ugmädia'agy mänaa yho'oguiän, mänaa jiuypijøjtägachän. Paady hajxy njugyhadaänäm homiänaaja nebiä Dios jiu gyhatiän. Coo hajxy jaduñ ngudiünämät nebiä Dios hajxy xyhanéhmäm, mänitä Dios hajxy jaduñ xquiumayáänäm.

25 Jaduñ mäwiin hajxy hijty njäya'ayhajtäm nebiä meeghajxy tiägowiäditiän jäguemduum. Cabä mädia'agy hajxy hijty nmäbøjcäm ja'a Jesucristocøxpä. Pero tøø hajxy nmäbøjcänä. Y

xcwieendähájtämä Jesucristo hajxy jaduhñ.

3

¹⁻² Mijts to'oxiøjtøjc, mwiingudsähgø'øwäbä mnihyhap hajxy. Coö mnihyhapä miädia'agy hajxy hoy mgudiúunät, y coö Jesucristo hajxy mwiingudsähgø'øwät, wehñdä mnihyhapä Diosmädia'agy hajxy miäbógät, pø cahnä hajxy hänäjty miäbøcyñä, hoy hajxy hänäjty waamb mga'a jagä näma'ay coö hajxy ween miäbøcy.

³⁻⁴ Je'e ja'a Dios jaduhñ quiumaaby coö hojioot hajxy mmøødhádät, coö mnihyhap hajxy mee'xxieemy mmägápxät. Je'eds jaduhñ tsoobaatp coö Diosmädia'agy hajxy jaduhñ mgudiúnät hamuumdu'joot. Y cab hajxy jaduhñ mänaa mdu'udägóyyät. Cab hajxy myajcumáyät pø jii howyit hodiucxy hajxy hänäjty mmøødá, pø jii oronaamdsøm, pø jii orotaatstøy hajxy hänäjty mmøødá, pø hoyyä mguhwaay hajxy howyit hoguiuhxotshaam hänäjty mgu'udy. Cabä Dios yø'øduhmbä jiaty møjpäda'agy, ni jaduhñ quia'a jega'añ.

⁵ Ja'a to'oxiøjcä Diosmädia'agy hajxy hijty jegyhajty panøcxpä, wyiingudsähgøøbiä ñihyhap hajxy hijty. Mee'xxieemy hajxy hijty. Miäbøjpiä Diosmädia'agy hajxy hijty coö hajxy hänäjty cwieendähada'añii ja'a Diósäm.

⁶ Jaduhñä Sara ja'a ñihyhap jecy wyiin-gudsähgøøyy, ja'a Abrahamhajpä. Mee'xxieemy hänäjty miägapxy. Quiumaayy ja'a Dios ja'a Sara jaduhñ. Y mijts to'oxiøjtøjc, jaduhñ mijtsä Dios xquiumáabiät coö mijtsä Sara wyiinmahñdy mbahijx mbadúunät. Hoy hajxy mwädítät

ja'a Dioscøxpä. Y cabä mhaa mjoot hajxy myagjadät cooc tyijy ja'a mnihyhap hajxy hänajty mmägapxtägoy.

7 Jaanä jaduhñ mijts nmägapx nhanehmbä, mijts ya'adiøjtøjc. Mdsoc mmée'xäbä mdo'oxiøjc hajxy. Mmøødhádäbä hojiot hajxy jaduhñ. Hix, cabä to'oxiøjcä miäjaahajxy miäbaady nebiä ya'adiøjc-hajxy miøcän. Paady hajxy mgüendähádät. Hix, xmiooby mijtsä Dios ja'a hoyhajtä weenhajt näguipxy møødä mdo'oxiøjc. Hix, näguipxiä Dios hajxy xyajnáhwa'açh møødä mdo'oxiøjc-hajxy. Tiuumbiä Dios mayhajt jaduhñ. Pero coo mdo'oxiøjc hajxy mga'a tsoc mga'a méé'xät, xiøøbä Dios hajxy jaduhñ mnä'ä pa'yáaxnät.

8 Mägu'ughajpädøjc, jaduhñ hajxy homiänaajä mnä'ägä niçhoc mnä'ägä nimiee'xøøjät nebiä tu'ugmägu'ug nebiä tu'ugpuhya'ayän. Mniñäxuudsøøjäp hajxy jaduhñ hamiñ haxøpy. Mee'xxieemy hajxy mnimiøødcapx mnimiøødmädia'agøøjät. Jaduhñ hajxy mhídät tu'ugmädia'agy nägøxiä. Jaduhñ hajxy hoy mdsaná'awät nägøxiä.

9 Coo mijts pøn cøxypänejpäiä xtiúnät, cab hajxy myaghawiimbijtagátsät. Y coo hajxy pøn xwyiinwóonät, cab hajxy mhadsoowiimbídät. Mmänuu'xtá'agäbä Dios hajxy jaduhñ coo ween piuhbedyii ja'a tøø xwyiinwóoñäbä. Jaduhñ mijtsä Dios tøø xyajnáhdijy coo Dios ja'a hoyhajtä weenhajt hajxy xmió'owät.

10 Pø mdsojpiä mhoyhäyow ja'a mhoçhána'a hajxy, cab hajxy mänaa mhøhñdá'agät.

Cab hajxy mänaa mgapxtägóyyät.

¹¹ Mnajtshixø'øwäbä mhaxøøgwiinmahñdy hajxy.

Hoy hajxy mjäya'ayhádät. Cab hajxy mnimiädsip
mnimiäma'adøøját ni mänaa.

¹² Hix, cwieendähajpiä Dios pønhatiä miädia'agy
mäbøjcäp.

Y coo Dios hajxy miänuu'xta'agy, mänit hajxy pi-
uhbedyii.

Pero ja'a häna'c-hajxy haxøøg wädijpä, cab hajxy
ñäxuuchii ja'a Diósäm,

nømä Diosmädia'agy miäna'añ.

¹³ Hoorä, coo hajxy hamuumdu'joot
mhöjiäya'ayhádät, cab hajxy jaduhñ pøn
cøxpänejpiä xtiúnät.

¹⁴ Jii jäya'ayhajxy näje'e, mijts xjia wi'i
chaaçhtiunaamb, hoy mijts mja höjiäya'ayhaty.
Pero ca'a hajxy mdsähgø'øy; ca'a hajxy tii mdajy
mmay. Ja'a Dios hajxy jaduhñ xcwieendähadaamb.

¹⁵ Hamuumdu'jootä Jesucristo hajxy
mwiingudsähgø'øwät. Hix, jaaya'ay hajxy
nWiindsøn_hájtäm. Y coo hajxy pøn xmiäyajtówät
tiiguiøxpä Diosmädia'agy hajxy hänäjty coo
mmäbøcy, cab hajxy mdsähgø'øwät; mnägápxäp
hajxy jaduhñ tiiguiøxpä hajxy coo mmäbøcy.
Mee'xxieemy hajxy jaduhñ mhadsówät, ca'a
yhajootma'adä.

¹⁶ Nägüentä hajxy tehñgajnä mwädítät, coo ha-
jxy jaduhñ mnä'ä cädiéeyät. Jaduhñä tøyhajt hajxy
mmøødhádät coo hajxy hänäjty hoy mwädity. Hoy
hajxy mwädítät, hoyyä jäya'ay hajxy xjia nähojy
xjia näya'axy coo Jesucristo miädia'agy hajxy hoy
myajtuunä. Coo hajxy jaduhñ hoy mjaançh

wädítät, mänitá häna'c-hajxy jaduhñ chähdiuna'añ
 coo mijts hänajty jaduhñ tøø xñänømy.

17 Hoy jaduhñ coo hajxy hoy mwädítät, hoy ha-
 jxy hänajty mja tsaächpøcy. Hiñ, ja'a Dios hajxy
 hänajty tøø xyajnähdijy coo hajxy tähoocjaty md-
 saächpøgät, hoy hajxy hänajty mja howiädity. Pero
 coo hajxy hänajty haxøøg mjatcø'øy, cab jaduhñ
 yhooyä; mgumädówäp hajxy jaduhñ.

18 Hoyyä Jesucristo mänaa quia'a jagä cädieey,
 tsaächpøjc je'ebä. Coo hajxy hoy xñähho'túutäm,
 jaduhñä nbojpa ngädieey hajxy xyajnähwáatsäm.
 Y jaduhñ hajxy jim xyajnøcxáanäm Dioswiin-
 duum. Tähoosquä hajxy xñähho'túutäm. Ja'a ñi'xä
 quiopc-hajtiä jaduhñ ho'c. Pero ja'a jiootä yh-
 Espíritu, cab jaduhñ ñä'a ho'cy; jujyñä hänajty
 jaduhñ yhity.

19 Ja'a jiäwøhñdyhaamä Jesucristo yhooyy
 maa ho'ogyjiäya'ayhajxy hänajty tsumy yhitiän.
 Jimä hawiinjemybiä mädia'agy hajxy hoy
 yajwiingapxø'øyii coogä Dios ja'a Jesucristo
 hänajty tøø quiexy mäyajnähwaatspä.

20 Paady hajxy hänajty tsumy yhity je'eguiøxpä
 coo Diosmädia'agy hajxy jecy quia'a mabøjcy
 mänaa Dios jia nägapxiän coo nøøgomdägoy hänajty
 tiägø'øwa'añ, mänaa Noé ja'a biarco hänajty
 yhädiuñän. Cabä Dios mänitiä yajtägøøyy tuubä.
 Jia hahijx jecy pø mabøgáañäxäbä miädia'agy
 hänajty. Coo jaduhñ yhijxy coo hajxy hänajty
 nämay quia'a mabøga'añ, mänitäts yajtägøøñä
 tuubä. Mänitä nøøgomdägoy tiägøøñä. Jagooyyä
 Dios yhijxy coo Noéhajxyhajtiä hänajty miäbøga'añ,
 ja'a hajxy hänajty näductújjiäbä. Jagooyyä Noéhajxy

jaduhñ miäbøjcy. Je'eds hajxy jaduhñ jiiby tsooc barcojooty, ja'a hajxy hñajty tøø yhädiũñäbä.

21 Nebiä Noéhajxy jecy chooquiän jiiby barcojooty mänaabä nøøgomdägoy jaduhñ tiägø'øyän, jaduhñ mäwlinäts je'e miäbaady néjjiäm coo hajxy nnäbéjtäm nøøjooty, coo Jesucristo hajxy xyajñähwáatsäm mänaa jiuypiojtägachän. Paady hajxy jaduhñ nnäbéjtäm nøøjooty, hijxtahñd jaduhñ coo hajxy nnähwáatsäm. Ja'a ngorazonghajxy jaduhñ wáatsäm, ca'a ja'a nni'xä ngopc-hájtäm. Coo hajxy jaduhñ nnäbéjtäm, jaduhñä Dios hajxy hamuumdu'joot nhawáañäm coo Jesucristo miädia'agy hajxy nnä'ägädä panøcxáañäm.

22 Coo Jesucristo hñajty tøø jiuypiojtägach, mänit jimñ ñøcxy tsajpootyp. Jimñ yhäñaañä maa Dios quiø'ø hahooyhaampiän. Je'e jaduhñ ñänøømby coo cuhdujt jimñ miøødä møj jaančh. Hix, wiingudsähgøøyyäbä Jesucristo jimñ. Ja'a Dios mioonsähajxy, ja'a hajxy jimñ hijpä tsajpootyp, je'eds hajxy jaduhñ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhanemyii ja'a Jesucristäm.

4

1 Coo Jesucristo chaačhpøjcy, miee'xtujc ja'a tsaachpä jaduhñ. Jaanä jaduhñ mijtspä, coo Jesucristo hajxy mmøødhity tu'ugmädia'agy, paady hajxy jaduhñ mmee'xtújpät, coo hajxy hñajty pøn xyajtsaačhpøcy. Coo hajxy jaduhñ mjaančh tsaachpøjpät nebiä Jesucristo chaačhpøjquiän, jaduhñ hajxy myajcähxø'øgät coo mhaxøøgwiinmahñdy hajxy tøø mhøxhijxnä.

2 Coo mhaxøøgwiinmahñdy hajxy jaduhñ mjaanč høxhíxät, hoy hajxy jaduhñ mjäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduhñä Dios hajxy xquiumáyät.

3 Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädia'agy hajxy ca'a mäbøjpä. Cab jaduhñ yhahixø'øy coo hajxy jaduhñ mjatcøøñät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaanč tehñ yhu'ugy mjaanč tehñ jioø'xy coo xøødsuu hijty maa jiadyii. Tsähdiuhndägoy hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabojsnaxy.

4 Y ja'a jäya'ayä Diosmädia'agy hajxy ca'a mäbøjpä, ja'a mijts hijty naxy mmägu'ughajpiä, yagjuøøby hajxy jaduhñ coo mijtsä mhaxøøgwiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä.

5 Pero coo Dios jaduhñ yajnähdiät coo hänajty tøø yhabaatnä, mänit hajxy hänajty tiøyhajtyega'añ maa Dioswiinduumän. Mänitä hajxy yajcumädowa'añii ja'a Diósäm, hoy hajxy hänajty jia jujyquiä, hoy hajxy hänajty tøø jia ho'ogy.

6 Hix, jaduhñä Dios jioot chocy coo ho'ogyjäya'ayä miädia'agy hajxy ween miäbøjcäxä, paadiä Dios ja'a yHuung Jesucristo jim quiejxy maa ho'ogyjäya'ayhajxy hänajty tsumy yhitiän. Jimä Jesucristo ja'a

Diosmädia'agy hoy yajnäaäch. Jadúhñägä ho'ogyjiäya'ayä jiäwøhñdyhajxy homiänaajä jiugyhádät nebiä Dios jiugyhatiän, hoyyá ñi'xä quiopc-hajxy hánajty tøø jia ho'ogy.

7 Habáatnáp - jaduñ coo naaxwiimbä wyiimbidaannä. Paady hajxy tehngajnä mniyajcopcø'øwøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot.

8 Je'e jaduñ nä'ägä tsoobaatp coo hajxy hamiñ haxøpy mniçhoc mnimiee'xøøjät. Hix, coo hajxy hamiñ haxøpy nniçhójcämät, mänit hajxy hoy nnimiämée'xämät. Jaduhñ hajxy hoy ndsánáayyämät.

9 Coo pøñ jim quiuyo'oy quiunaxó'øwät maa mjøøñ maa ndøjc-hajxiän, hamuumdu'joot hajxy myajtøjtägó'øwät. Myajcay myaghú'ugáp hajxy jaduñ hahoy haween.

10 Cøjwiinduumä Dios wiinmahñdy hajxy xmióoyyäm coo tuung hajxy wiingjaty nmøødhájtäm. Jaduhñä jäya'ayhajxy nägøxiä piuhbedøøjät, ja'a hajxy hánajty tøø miäbøquiäbä ja'a Jesucristocøxpä. Jaduhñ hajxy mnibihuhbedøøjät nebiatiä Dios tuung hajxy cøjwiinduum tøø xmiø'oyän.

11 Pønjaty tøø tiuungmo'oyii coo Diosmädia'agy hajxy yajwá'xät, hoy hajxy quiapx miädiá'agät nebiä Dios quiapxy miädia'aguiän. Pønjaty tøø tiuungmo'oyii coo hajxy miäbuhbédät, ween hajxy jaduñ hamuumdu'joot miäbuhbety.

Ja'a Dios jaduñ puhbédäp. Coö hajxy hänäjty tijaty mduna'añ, hoy hajxy mdúnät; jaduñä jäya'ayhajxy miäböğät coö Dios miöjjä jiaančhä. Wyiingudsähgø'øwaambiä Dios hajxy jaduñ je'eguiøxpä coö Jesucristo hajxy hoy xyajnähwáatsäm. Cøjxta'axiøø ja'a Dios wyiingudsähgø'øwa'añii. Cøjxta'axiøø möjcuhdujt miøødhada'añ. Amén.

¹² Mägu'ughajpädøjc, cab hajxy myagjuó'øwät coö tsaächpä hajxy naxy xpiaady möc-haampiä. Hix, tsipcøxpä tsaächpä hajxy xñä'ägä paada'añ.

¹³ Jaduñ quiähxó'øgät pø hamuumdu'jootä Diosmädia'agy hajxy mjaančh mäböcy ja'a Jesucristocøxpä, pø caj. Hix, maas hanaxiä Jesucristo chaačhpøjcy mänaa hajxy hoy xñähho'túütäm. Hix, coö Jesucristo hajxy jaduñ mmøødhity tu'ugmädia'agy, paady hajxy jaduñ tsipcøxp mbadsaačhpøjpät. Y coö Jesucristo hänäjty yaa quiädaactägatsa'añ hädaa yaabä naaxwiin, mänit hajxy hänäjty mjaančh tehñ xioonda'aga'añ. Paady hajxy jäda'ahaty mxoondaacnät, hoyyä tsaächpä hajxy jaduñ xjia paady. Pero cabä tsaächpä hajxy jaduñ myagjuó'øwät.

¹⁴ Coö hajxy pøn xñähójät ja'a Jesucristocøxpä, cab hajxy myagjuó'øwät. Pero mxoonda'agäp hajxy jaduñ. Hix, jaduñä Dios ja'a yhEspirituhaam hajxy xpiuhbédät möødä wyiinmahñdyhaam. Coö mijsä jäya'ay xyhíxät coö hajxy mmee'xtucy coö hajxy hänäjty mdsaačhpøcy, mänitä Dios hajxy wyiingudsähgø'øwa'añ.

¹⁵ Hahixøøby jaduñ coö hajxy mdsaačhpøgät, pø tøø hajxy hänäjty mmäjäya'ay-yagho'ogy, pø

tøø hajxy hānajtj mmāmēēch, pø tøø hajxy hānajtj myajtgø'øy maa cueendā hajxy hānajtj mga'a møødän. Cab jaduhñ yhooyä coo hajxy jaduhñ mjatcø'øwät.

¹⁶ Pero je'e mǎbøcypǎ cǎj chāhdiuhñdmøødä coo hajxy mdsaačhpøgät je'eguiøxpä coo Jesucristo hajxy hānajtj mwiingudsähgø'øy. Jootcujc hajxy jaduhñ mhídät. Mnāmá'awäbä Dios hajxy “Dioscujú'uyäp” ja'a Jesucristocøxpä.

¹⁷ Tøø yhabaatnä coo Dios hajxy xyajtøyhajtyegānäm. Coø Diosmädia'agy hajxy nmǎbøjcäm, paady hajxy jayøjp xyajtøyhajtyegānäm, paady hajxy jayøjp xyajtsaačhpøjcäm. Pero ja'a hāna'cä Diosmädia'agy hajxy ca'a mǎbøjpä, coo hajxy hānajtj tiøyhajtyega'añ, maas hanaxiä hajxy hānajtj chaačhpøga'añ.

¹⁸ Siémprämä hojiäya'ayhajxy chaačhpøga'añ. Maas hanaxiä ca'awiindøyhāna'c-hajxy chaačhpøga'añ, ja'a Dios hajxy ca'a wiingudsähgøøbiä.

¹⁹ Coo hajxy hānajtj pøñ xyajtsaačhpøcy nä'ä nägoobä, cab hajxy mmøjpädá'agät. Tehngajnā hajxy hoy mjaac jäya'ayhädät. Hix, ja'a Dios hajxy hānajtj tøø xyajmädsocy coo hajxy mdsaačhpøgät.

5

¹ Mijts majjāya'adiøjc-hajxy, ja'a hajxy jim tuumbä tsajtøgooty, mijts chamñ nmägäpñ nhane'emaamby. Nmøødhøchä cuhdujt jaduhñ cooçh mijts jaduhñ nmägäpñ nhané'emät, je'eguiøxpä cooçh tøø nmājaabä, møød cooçh jim nduumbä tsajtøgooty. Nhijxhó'c-høchä Jesucristo

jim cruzcøxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hänajty jim xyajncxáanäm tsajpootyp, høøch møød mijts. Jimä hoyhajtä weenhajt hajxy xmio'owáanäm pedyii.

² Mijts majjäya'adiøjc, hoyyä Diosmädia'agy hajxy myajnähiø'øwät hamuumdu'joot, ca'a yhadsip ca'a yhajootma'adä. Hamuumdu'jootä cu'ug hajxy mmägäp mhané'emät. Hix, ja'a Dios hajxy tøø xpiäda'agy coo cu'ug hajxy jaduhñ myajnähiø'øwät, møød coo hajxy mmägäp mhané'emät. Cab hajxy xädø'øñguiøxpä myajnähiø'øwät.

³ Cab hajxy møc møc mhané'emät. Mee'xxieemy hajxy myajnähiø'øwät. Hoyyä Diosmädia'agy hajxy myajtúnät; jaduhñä cu'ug hajxy xpiähix xpiadúnät.

⁴ Y coo Jesucristo yaa quiädaactägätsät, ja'a hajxy nWiindsønähjtämbä, mänit hajxy xquiumaya'añ pø tøø hajxy hänajty hoy myajnähiø'øy. Mänit hajxy hänajty jim xyajncxa'añ tsajpootyp. Cøjxta'axiøø hajxy hänajty jim mhida'añ.

⁵ Møød mijts muutsc-häna'c, jaduhñ mijtspä, mwiingudsähgø'øwäbä majjäya'ay hajxy. Coo hajxy waamb xmiägäp xyhané'emät, mgudiúnäp hajxy jaduhñ. Hahoy haween hajxy mnibihbedøøjät hamiñ haxøpy, hoy miøjjä hoy miutscä. Hix, coo hajxy jootmøj mnibiäda'agøøjät, xyajcumädöwäbä Dios hajxy jaduhñ. Pønjatycapxp mädiaacp mee'xxieemy, je'edsä Dios piuhbejpy. Móoyyäbä hoyhajtä weenhajt hajxy jaduhñ.

⁶ Coo Dios hajxy jaduhñ mänaa xyajtsaaçhpögät, cab hajxy mmøjpädá'agät. Jim hajxy

mnibiäda'agóøjät maa Dios quiø'øba'c tiecypia'cän. Møcmäjaa Dios jiaančh tehṃ miøød. Hiṁ, cujequiä Dios ja'a tsaachpä hajxy xyajnáhwá'adsät. Mänit hajxy jootcuje xjiaančh tehṃ yaghida'añ.

⁷ Coø hajxy hánajty tii mnädajy mnämay, mmänuu'xtá'agäbä Dios hajxy jaduhṃ coø hajxy ween xyaghoyøøyyä. Hiṁ, homiänaajä Dios hajxy xcwieendähaty.

⁸ Mniyajcopcø'øwóøjöp hajxy; jaduhnä Jesucristo miädia'agy hajxy hoy mbanøcxät tehṃgajnä. Jaduhnä mõjcu'ugongä wyiinmahñdy quia'a mäjädá'agät. Hiṁ, ja'a mõjcu'ugong, homiänaajä hajxy jaduhṃ xmiädsiphájtäm. Xjia wi'i yajtu'udägoyyäänäm hajxy jaduhṃ.

⁹ Cabä mõjcu'ugongä miädia'agy hajxy mmäböjät. Hamuumdu'jootä Diosmädia'agy hajxy myajtúnät tehṃgajnä. Hiṁ, pønjätiä Diosmädia'agy mäböjp wiinduhmyhagajpt, jaduhṃ hajxy chaachpøjöpä nej mijs mdsaačhpøquiän.

¹⁰ Cab hajxy jejcy mdsaačhpøga'añ. Coø Dios ja'a tsaachpä hajxy hánajty tøø xyajnáhwa'ačh, mänitä Dios hajxy hamuumdu'joot xyajmäbøgaannä ja'a Jesucristo miädia'agy. Ca'xy pedyii Dios ja'a wyiinmahñdy hajxy xyajnáhixø'øwa'añ. Ja'a Diósäts hajxy jaduhṃ xcwieendähájtäm, hoy hajxy nej cu nja jajt cu nja habéjtäm. Tiuumbiä Dios mayhajt jaduhṃ maa højtscøxphájtäm. Jaaya'ay hajxy jaduhṃ tøø xyajnáhdíjjäm coø Jesucristo hajxy jim xyajnöcxäänäm tsajpootyp. Cøjxta'axiøø hajxy jim nhidäänäm. Hiṁ, cøxiä Dios ja'a hoyhajtä weenhajt

hajxy jaduħn xmióoyyäm.

¹¹ Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios mõjcuħdujt miøødhada'añ. Tøyhajt jaduħn.

¹² Ja'a mägu'ughajpä Silvano hädaa nocy jahby. Høøch nnajtscapxøøyyäp. Cab hädaa nocy jiaty yoñä. Hoyyä Silvano Diosmädia'agy jiaanch tehñ yajtuñ. Tøyhájthøch chamñ tøø ngapxy tøø nmädia'agy nebiä Dios tøyhajt wyiinmayyän. Tøø Dios mõjmayhajt tiuñ maa højtscøxphájtäm. Tøø hajxy jaduħn xyajmädsójcäm coo hajxy jim xmiøødhájtämät tsajpootyp.

¹³ Ja'a jäya'ayhajxy yaa tsänaabiä Babilonia, ja'a Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduħn. Nej mijtsä Dios xyajnähdiijiän coo miädia'agy hajxy mmäbøjcät, jaanä jaduħnä jäya'ayhajxy yaabä yajnähdijjäbä coo hajxy miäbøjpät. Jaduħn mijtsä mmägu'ughajpä Marcos xyajpoo'xpä. Nébiøchá nhamdsoo húungänä Marcos njuø'øy.

¹⁴ Coo hajxy hänäjty mhamugø'øy Dioswiingudsähgøøbiä, hamiñ haxøpy hajxy mniyajpoo'xøøjät. Jaduħn hajxy myajcähxø'øgät coo hajxy tøyhajt mniçocy mnibia'häyoyii hamuumdu'joot.

Pønjetiä Diosmädia'agy panøcpx ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

4e564219-157f-5807-b810-47a15308b8b8